



Minister Otmar Oduber sumamente contento cu exito di festival cultural

Festival un Canto na nos Himno y Bandera su prome fin di siman a conta cu sosten masal

APESAR cu Minister Otmar Oduber ta na Hulanda cu un gran cantidad di reunion cu ta tumando luga na diferente nivel y cu e apertura di “Gezichten van Aruba” na Hilversum Museum, e mandatario ta hopi pendiente di e desaroyonan tumando luga aki na Aruba den cuadro di nos celebracion nacional.

Sr. Oduber a declara di ta sumamente contento cu e prome fin di siman di Un Canto na nos Himno y Bandera a conta cu un publico masal apoyando nos hobennan participante. Cada un anochi a conta cu un publico di mas di

3000 persona cu a bishita e evento riba Linear Park. Un vision cu Minister Oduber tabatin pa habri e aspecto cultural aki poniendo e festival den un espacio publico, cu a demostra fructifero mirando bek na un fin di siman cu un festival cu a carga apoyo masal.

Aruba a ranca sali riba un bon pia pa loke ta nos celebracion nacional di 30 aña di nos Status Aparte y 40 aña di nos Himno y Bandera.

30/40 ta un celebracion grandi pa cual Gobierno di Aruba a percura pa dorna nos isla pa crea e ambiente di nos celebracion nacional y pa cada un di nos por ta orguyoso di nos logronan.

Sr. Oduber ta declara cu na Hulanda e palabra orguyo a resona conectando e palabra na nos hendenan. E propio Minister Plasterk di Hulanda a menciona e hecho cu hopi ta e Arubianonan orguyoso di nan isla y sigur cu esaki ta contagioso hasta pa nos madre patria

di por bisa cu nan tin un isla den Caribe cu ta Aruba.

E mandatario ta lamenta di no por tabata presente, pero lo t'ey sigur pa e festival e fin di siman aki unda lo tin e categoria di nos adultonan aportando na nos Cultura.





Festival Un canto na nos Himno y Bandera a aporta cu riba 100 composicion completamente nobo dedica na nos isla, treci padilanti pa cada un cantante expresando nan orguyo y amor, engrandeciendo nos Cultura.

Minister Oduber kier a probecha e ocasion pa manda un palabra di felicitacion special pa Ezahayra Artage ganado absoluto di e categoria 4-6 aña, Genevan Maduro ganado di categoria 7-9 aña, Jadiene Croes ganado di categoria 10-12 aña, Zaina Falconi ganado di categoria 13-17 aña y

tur e finalistanan cu a haci un tremendo presentacion durante e festival Un Canto na Nos Himno y Bandera infantil y hubenil.

Un palabra di gradicimento na cada un mayor, musico y tur cu por a contribui pa haci participacion di cada un mucha posibel. Tambe na tur cu di un of otro manera a forma parti di organisa e tremendo apertura aki pa nos celebracion nacional.

Aruba ta celebra den grandi cu un cantidad di evento durante henter e luna di maart, Minister Oduber ta invita comunidad completo pa sigui apoya cada evento demostrando e orguyo y amor cu cada un di nos tin pa nos pida baranca.

